



REPUBLIKA E SHQIPËRISË
KRYEMINISTRIA
MINISTËR I SHTETIT PËR RININË DHE FËMIJËT

**INFORMACION PËR PROJEKT VENDIMIN E KËSHILLIT TË MINISTRAVE
PËR MIRATIMIN E STRATEGJISË KOMBËTARE TË RINISË, 2022-2029**

**I. QËLLIMI I PROJEKTAKTIT DHE OBJEKTIVAT QË SYNOHEN TË
ARRIHEN**

Projektakti për “Miratimin e Strategjisë Kombëtare të Rinisë, 2022-2029” (SKR 2022-2029), propozohet nga Ministri përgjegjës për rininë.

Strategjia Kombëtare për Rininë 2022 – 2029 do të jetë dokumenti ku do të bazohen politikat për aktivizimin, përfshirjen dhe mbështetjen e të rinjve. Ky dokument do të synojë hartimin e politikave rinore kombëtare integruese, për adresimin e problemeve të ndryshme me të cilat përballen sot të rinjtë e që lidhen me sfida si, përfshirja e tyre në proceset vendimmarrëse, punësimi, edukimi, teknologjia dhe inovacioni, rritja e aktiviteteve në lidhje me artet dhe zëjet, shtim të aktiviteteve sportive, vullnetarizëm etj. Strategjia Kombëtare për Rininë 2022 – 2029 do të jetë në përputhje me Strategjinë Evropiane për Rininë 2019 – 2027.

Strategjia Kombëtare e Rinisë 2022-2029, së bashku me dokumentet strategjike shoqëruar harmonizohet dhe është në përputhje të plotë me qëllimet, objektivat dhe parashikimet e SKZHI-II sipas shtyllave 2 (Rritja ekonomike përmes rritjes së konkurrueshmërisë dhe novacionit) dhe shtyllës 3 (Investimi në kapital njerëzor dhe kohezion social).

Ky dokument strategjik bazohet në ligjin nr. 75/2019 “Për Rininë” i cili siguron bazën ligjore për hartimin e politikave dhe programeve strategjike për rininë. Me urdhërin e datës 30.12.2021 të Kryeministrit të Shqipërisë, ShTZ, Edi Rama u ngrit edhe grupi ndërministror i punës (GNP) për të hartuar këtë strategji.

Puna për këtë strategji filloi me një seri sesionesh konsultimesh me të reja dhe të rinj në të gjithë vendin në të cilat qeveria përfaqësohej nga Kryeministri dhe Ministri i Shtetit për Rininë dhe Fëmijët. Në këto sesione konsultimesh morën mbi 1200 të rinj. Takime konsultative u zhvilluan edhe me 45 organizata të ndryshme rinore si edhe me 61 përfaqësues të njësive të vetëqeverisjes vendore. Me ngritjen e GNP takimet konsultative të rregullta vijuan edhe me këtë grup.

Draftet e para të strategjisë u konsultuan edhe me një grup prej 200 të rinjsh të mbajtur në Qytezën e Fëmijëve në Korçë në datat 19-20 mars 2022.

Politika kombëtare e strategjisë së rinisë dhe përpjekjet programuese përqendrohen në sigurimin e barazisë së mundësive dhe të drejtave, mbështetjes dhe angazhimit për të rejtat dhe të rinjtë që

janë më të prekshëm, të marginalizuar dhe më të goditur nga mungesat e shumta, të tilla si varfëria, dhuna, keqtrajtimi, paaftësia dhe përjashtimi social. Kjo strategji synon të orientojë rininë shqiptare për veprim të mëtejshëm i cili ndikon pozitivisht në të ardhmen e tyre. Politikat që zhvillohen në kuadër të kësaj strategjie janë këto qëllime:

- Të rejat dhe të rinjtë marrin pjesë në mënyrë aktive në shoqëri dhe ndihen të fuqizuar për t'u shprehur me zërat e tyre
- Rritje e aftësive për punësim e të rinjve, mbështetur nga shërbimet e këshillimit të karrierës dhe punësimi që janë të orientuara nga të rinjtë, rritja dhe përmirësimi i mundësive për të hyrë në tregun e punës në bazë drejtësisë¹ dhe të shanseve të barabarta.
- Mirëqenie aktive, e shëndetshme, fizike, sociale dhe mendore e të rinjve
- Novacion dhe edukim cilësor për të mbështetur të rinjtë për të arritur potencialin e tyre të plotë
- Siguri, mbrojtje dhe gjithëpërfshirje e të rinjve në të gjithë diversitetin e tyre, veçanërisht për ata të rinj që janë në situatë rreziku apo vulnerabiliteti.
- Politika ndërsektoriale rinore e koordinuar, e bazuar në fakte, me mekanizma të mirëfinancuar të ofrimit, monitorimit dhe vlerësimit horizontal dhe vertikal

Duke marrë në konsideratë zhvillimet e deritanishme vizioni për zbatimin e Strategjisë Kombëtare të Rinisë 2022-2029 është:

Strategjisë kombëtare 2022 – 2029 ju jep mundësi dhe mbështet të rejat dhe të rinjtë për t'u bërë partnerë aktivë në zhvillimin e Shqipërisë.

Misioni i kësaj strategjie është:

Rritja dhe përmirësimi i mundësive, shërbimeve, dhe mbështetjes për të rinjtë dhe në bashkëpunim me të rinjtë në Shqipëri

Vizioni synohet të jetësohet përmes 3 qëllimeve politike:

- **Qëllimi i politikës 1:** Të rejat dhe të rinjtë marrin pjesë aktivisht në shoqëri dhe ndihen të fuqizuar për t'u shprehur me zërin e tyre. Politikat ndër sektoriale rinore janë të koordinuara, të bazuara në analiza, me mekanizma të mirë financiar
- **Qëllimi i politikës 2:** Mbështetet dhe nxitet novacioni rinor dhe rritja e aftësive dhe profesionalizmit të të rejave dhe të rinjve përmes edukimit cilësor në TIK dhe fusha të tjera të zhvillimit digjital duke rritur dhe përmirësuar kështu mundësitë për të hyrë në tregun e punës.
- **Qëllimi i politikës 3:** Mirëqenia aktive, e shëndetshme, fizike, sociale dhe mendore e të rinjve. Siguria, mbrojtja dhe përfshirja e të rinjve në të gjithë diversitetin e tyre, veçanërisht për ata të rinj që janë në situatë rreziku apo mënjanimi social (vulnerabiliteti)

Në vijim janë dhënë qëllimet e politikave dhe objektivat strategjikë e propozuar.

Qëllimi i politikës 1: Të rejat dhe të rinjtë marrin pjesë aktivisht në shoqëri dhe ndihen të fuqizuar për t'u shprehur me zërin e tyre. Politikën ndërsektoriale rinore janë të koordinuara, të bazuara në analiza, me mekanizma të mirë financiar

- **Objektivi specifik 1.1.** Të rinjtë janë të mirë-informuar rreth mundësive për të mësuar, fituar përvojë organizative dhe vullnetarizëm, dhe për të marrë pjesë aktivisht në jetën qytetare, sociale dhe politike
- **Objektivi specifik 1.2.** Politika rinore është e koordinuar, e bazuar në analiza dhe e harmonizuar në sektorë të ndryshëm duke kërkuar kohezionin dhe optimizmin e burimeve dhe duke forcuar si instrument zbatues të këtyre politikave Agjencinë Kombëtare të Rinisë.
- **Objektivi specifik 1.3.** Studimet rinore zhvillohen dhe bëhen pjesë e programeve të studimit në institucionet e arsimit të lartë dhe referenca për zhvillimet e mëtejshme në fushën e rinisë.

Qëllimi i politikës 2: Mbështetet dhe nxitet novacioni rinor dhe rritja e aftësive dhe profesionalizmit të të rejave dhe të rinjve përmes edukimit cilësor në TIK dhe fusha të tjera të zhvillimit digjital duke rritur dhe përmirësuar kështu mundësitë për të hyrë në tregun e punës

- **Objektivi specifik 2.1.** Të rinjtë janë të aftësuar, të mirëinformuar në lidhje me mundësitë për punësim dhe në gjendje të bëjnë zgjedhje autonome kur i bashkohen popullsisë ekonomike aktive
- **Objektivi specifik 2.2.** Të rinjtë janë të informuar mirë për mundësitë arsimore të lidhura me tregun e punës dhe ju mundësohet i mësuar cilësor si në arsimin formal ashtu edhe në atë joformal duke kontribuar në zhvillimin e kompetencave, aftësive dhe virtyeteve
- **Objektivi specifik 2.3.** Të rinjtë, në të gjitha kushtet dhe situatat, përfaqësojnë një fokus të veçantë në aftësim, punësimin, sipërmarrje dhe politika punësimi

Qëllimi i politikës 3: Mirëqenia aktive, e shëndetshme, fizike, sociale dhe mendore e të rinjve. Siguria, mbrojtja dhe përfshirja e të rinjve në të gjithë diversitetin e tyre, veçanërisht për ata të rinj që janë në situatë rreziku apo mënjanimi social

- **Objektivi specifik 3.1.** Mbrojtja mbështetja dhe siguria e të rejave dhe të rinjve, veçanërisht e atyre në situatë rreziku, në vendin ku jetojnë dhe hapësirën digjitale
- **Objektivi specifik 3.2.** Të rejave dhe të rinjve ju ofrohen shërbime shëndetësore miqësore dhe ata praktikojnë stile jetese të shëndetshme, veçanërisht në lidhje me shëndetin dhe mirëqenien e tyre mendore, sociale, fizike dhe seksuale
- **Objektivi specifik 3.3.** Të rejat dhe të rinjtë mbështeten në përfshirjen dhe integrimin e tyre në shoqëri duke pasur mundësi për strehim dhe argëtim (në kulturë, art dhe sport)

